

DISSERTATIO INAUGVRALIS MEDICA,  
DE  
**FEBRIBVS MALIGNIS.**

---

QVAM  
RECTORE VNIVERSITATIS MAGNIFICENTISSIMO,  
SERENISSIMO PRINCIPE AC DOMINO  
DOMINO  
**IO. CAROLO LVDOVICO,**

COMITE PALATINO RHENI,  
VTRIVSQUE BAVARIAE DVCE, rel. rel.

PRAESIDE  
VIRO EXCELLENTISSIMO AC EXPERIENTISSIMO  
DOMINO

**PHILIPPO FRIDERICO GMELIN,**

MED. DOCT. BOT. ET CHEM. PROF. PVBL. ORD.

SOCC. REG. SCIENT. LOND. ET GOETT. SODALI,

PRAECEPTORE SVO AETERNVM COLENDO,


AD CONSEQVENDOS SVMMOS IN MEDICINA HONORES

D. XX. IVNII A. MDCCLIX.

IN AVLA NOVA HORIS CONSVETIS

DEFENDET AVCTOR.

**IOANNES FRIDERICVS CONSBRVCH, *Stuttgardianus.***



TVBINGAE, LITTERIS ERHARDIANIS.

*L. Far. Brw*

Frustra cruorem pulsibus incitis  
Ebullientem pollice comprimis  
Attentus explorare venam  
Quæ febris exagitet tumentem.  
Frustra liquores, quot chemica expedit  
Fornax, & error sanguinis, & vigor  
Innatus herbis te fatigant:  
Serius aut citius Sepulchro  
Debemur omnes, vitæque deferet  
Expulsa morbis corpus in hospitum  
Lentumque deflebunt nepotes  
(Reliquias animæ,) cadauer!  
Manes videbis tu quoque fabulas  
Quos pauciores fecerit ars tua,  
Suumque victorem vicissim  
Subiiciet Libitina victrix.

*Ad D. D. HANNES, insignissimum Medicum  
& Poëtam*

*JOSEPH. ADDISON, Esq. Miscellan.  
Works in Verse and Prose.*





## PROLOGVS.

**Q**uam primum animum ad scribendum adpelle-  
rem, id inprimis curandum putavi, vt ex re-  
bus medicis aliquid pertractandum mihi fume-  
rem, quod inaugurali specimine haud prorsus  
videretur indignum. In hoc itaque intentus,  
ex morborum historia grauius aliquod momentum selegi.  
Neque id immerito. Ad solidiorem etenim eorum cogni-  
tionem, & facilem atque tutam curationem, optima quæ-  
uis, quæ Theoria tradit, collimant, „ neque propter se  
cætera omnia ad artem spectantia, aut discimus, aut doce-  
mus, aut denique auscultamus, sed quod eorum vnum-  
quodque sit ad finem vtile. *a)* Negare tamen haud pos-  
sum, qualemcumque hunc laborem ne meis quidem votis  
fatis-

*a)* GALENVS de venæsectione aduersus Erasistratum, cap. 7.





satisfecisse, non etenim tot virium in me erat, neque tantum experientiae, quibus id possem efficere. Fateor, me ideo quodammodo summorum aliquot, in arte medica virorum usum esse experientia, Illustris inprimis atque celeberrimi Viri, (cuius nunquam animo meo excidet iusta veneratio,) B. BRENDÉLII. Quæ itaque, partim ex facundissimo magni Viri ore ipse accepi, partim e solidissimis eiusdem scriptis hausi, eorum aliqua ad meos labores transferre non dubitavi, his aliquid inde ornamenti atque ponderis accessurum esse, probe persuasus. Nonnulla insuper immiscere placuit, quæ a communi sententia decedunt, neque tamen, ut puto, absque ratione. Ea isti diiudicent, quibus potius veritatem vindicandi, quam male sanis imprecationibus in suas speculationes prudentiores cogendi est animus. Curationem febrium malignarum haud integram tradidi, neque enim id temporis ratio permittebat, neque, quo minus in maius excresceret Dissertatiunculæ moles, cura. Ne tamen omnem curationem neglexisse viderer, aliqua de vomitoriis adieci, quæ ad hanc febrium classẽ proximẽ spectant. Denique & id monendum duco, complura me forte dixisse, quæ mitiori indigeant diiudicatione, aut saltem nullius partis studiosa. Hanc a bonis omnibus facile obtinebo, utpote in neminem iniurius, reliquos autem neque curo, neque extimesco.





## §. 1.

**Q**uam primum de febribus malignis agere institui, id ante omnia agendum putavi, ut generalior quidam, & rei tractandæ aptus de febribus in genere conceptus præmitteretur, omnem reliquam disquisitionem tunc commode illustraturus.

## §. 2.

In deducenda febrium denominatione auctores, ut mos est, diuersas alunt sententias. Eas nunc omnes & singulas perquirere nolo, dico tantum meam, per quam febrem a feruore nomen accepisse credo. Hæc deriuatio etenim communi Veterum opinioni respondet, qui calorem pro febris essentia habuerunt, quum πυρελος & πυρεξις passim apud Veteres quamuis febrem significent, πυρ vero vocari apud HIPPOCRATEM febrem, ubi vehementissima fuerit, ex GALENO *b)* constat.

## §. 3.

Symptomata febris, quam maxime communia, ad eius definitionem inprimis sunt apta. Nulla autemprehendimus, quæ magis ea dici mereantur, præter calorem, horrorem & frequentem pulsum. Febrem itaque haud incongrue definimus per morbum horrore, calore & celeri pulsu conspicuum. *c)* In omni febre a causis internis orta hæc adsunt.

## §. 4.

Vbi nunc dicta (§. 3.) symptomata velociter & cum periculo decurrunt, ibi febris *acuta* est.

## §. 5.

*b)* Comment. 3. in Epid.

*c)* BOERHAAVII Aphorismi, §. 563. & Comment. Ill. v. SWIETEN in h. Aph.





## §. 5.

Febrium acutarum initium a primo algore recte deducimus. Longissima earum duratio ad vigesimum diem circiter potest æstimari. Complures acutæ intra hunc terminum finiuntur, & paucae ad aliquot dies eundem excedunt. Observationes quidem prostant de acutis, ad duos menses seu ulterius productis, & ipse *d*) HIPPOCRATES earum nouissimum diem sexagesimum demum esse posse contendit, sed numquam vna eademque acuta, in tantum producet, aderit potius series acutarum ex imperfecta crisi se se excipientium, quarum initium semper nouo algore erit notatum. Nos itaque partiales has febres cum GALENO acutas dicimus, sed integram congestionem diuturnum morbum recte appellamus.

## §. 6.

Febres *malignæ* a fallaci atque peruersa sua indole nomen suum accepisse videntur, & hac ratione quoque ab acutis quam maxime differunt. Ex leuibus etenim, & nil mali, vti videtur, minantibus initiis, breui tempore in maximi discriminis morbos exsurgunt, mortemque ut plurimum inopinato & inter symptomata mitia ad conspectum, sed præter opinionem grauiora afferre solent; pessimorum hominum in morem, qui amica fronte aliorum interitum eo tutius machinantur. Quos autem viuos dimittunt hæ febres, ad varios tamen morbos chronicos deducunt. Symptomatum insuper ea est praua conditio, vt, neque inter se, neque cum morbi temporibus consentiant. Quam maxime malignas febres quarto die vel citius in mortem de-  
finere

*d*) In Prænot. XLI.



finere HIPPOCRATES auctor est. *e*) Sed licet non negemus dari tales, potior tamen pars longius tempus assequitur, & non raro post varias febres per imperfectam crisin se invicem excipientes, aliquot demum hebdomadibus terminantur.

### §. 7.

Si ad vetustissimos artis nostræ viros ascendimus, videmus sane *Paraphrenitides* ipsis eas febres fuisse, quæ nobis malignæ sunt, neque istas vllis exceptionibus a malignis distinxisse. Eo itaque nomine adhucdum vti potest, cui recentior denominatio minus placet. Malignæ forsan iisdem *Paraphrenitides* dictæ sunt, ob deliria, his æque frequentia, *f*) ac phrenitidi, licet magis sint taciturna, rarius furiosa, nisi vera phrenitis symptomatice superueniat. GALENI tempore demum *Paraphrenitidis* definitio ad inflammationem diaphragmatis relata videtur. Phrenitides Hippocratis cum malignis nostris pariter conueniunt, qualescunque etenim acutæ, cum præmatura mentis perturbatione coniunctæ, ipsi phrenitides vocatæ sunt, unde in epidemicis historias legimus phrenitidum, quæ a nostris malignis nullo modo differunt. Latius itaque accipiendas esse istas censemus, ipso GALENO consentiente, *g*) quam pro sola tantum vera phrenitide.

### §. 8.

Cadauera ex his febribus defunctorum circa hepar lienem, tendinosas diaphragmatis portiones, cor, pulmones,

*e*) Coacæ Prænotiones. 122.

*f*) Forsan Diaphragmatis inflammationem, adeo frequentem in his febribus, in cadaueribus conspexerunt, & inde desumserunt suam denominationem?

*g*) Commentarius 1. in I. Prorheticorum.





nes, intestina, omentum, mesenterium & alias corporis partes, varia exhibent, quæ huc prorsus spectant, phænomena. Atque, vt aliqua eorum hic adducamus, omentum sæpe bile atque cruore perfusum obseruatur, lien pariter bile tinctus, maculosus nonnunquam, interdum durus. Hepatis concaua pars plerumque tractibus luridis, diversisque maculis, fatis sæpe profundis occupatur, conuexa interim parte, aut illæsa, aut tantum nimium rubente, id quod ipse vidi in homine petechiali febre defuncto. Vesicula fellea bile atrouiridi, flammea & vehementer foetida, interdum autem oleosa, pingui ac crassa referta est, aut nimium distenta. Tendineæ diaphragmatis portiones cruentis extrauasionibus notantur, mesenterium autem & ventriculus cum omni intestinorum tractu exterius nonnunquam bile largius tincta reperiuntur, flatuque turgida, tetra inflammatoria colluie scatent. Omittimus alia, quæ in cerebro, meningibus, aliisque corporis partibus reperiuntur inflammatorii generis phænomena.

### §. 9.

Quodsi hæc, quæ diximus, penitus perscrutamur, de præcipua sede his febribus assignanda solliciti, negare non possumus, eam pro nostra sententia, si non semper, certe ut plurimum, in viscera chylicationi seruientia, præcipue hepar, & quam continet, bilem esse reponendam: Vnde per consensum paris vagi neruorum, & intercostalis, complura symptomata absque dubio nascuntur, quorum ideo potior pars e spasmorum genere erit consensualis. Quid autem qualecunque illud sit, quod istas corporis partes in tantum afficit, & vim motricem tam subito, tam valide prosternt, id sane ignoramus, quo enim nomine illud expli-





plicabimus, quod omnes sensus adeo fugit, neque ulli experimentorum industriæ potest submitti?

§. 10.

Causa remota harum febrium uniuersalior quædam est, quæ vel in aëre hæret, vel in victu, vel etiam in ipsius loci conditione. Semper enim aut epidemicas esse has febres deprehendimus, aut endemias, rarius sporadicas. *Epidemicæ febres malignæ* sunt speciei consimilis, in plures eodem tempore sæuientes. Id agunt communem quidem ob causam, sed quæ loco, in quo grassantur, perpetua non est. Harum itaque causa, neque fixa esse potest, neque ut in endemiis morbis, loco inquilina. Omnes autem, quot quot sunt epidemicæ malignæ, & exanthematibus exasperantur, & contagium secum ferre consuerunt. Febres *endemice malignæ*, a propria, istius quo resident loci, aut provinciæ, rerum non naturalium, conditione, aut a recepto ibidem vitæ genere, sunt deducendæ. Exempla esse queunt, febris Hungarica, pestilentialis, Sudor Anglicus, & aliæ huiusmodi febres. Quæ *sporadicæ* sunt e *malignis*, istas tum temporis deprehendimus, quo & alii, non eiusdem indolis morbi per populum sunt frequentes. Causas igitur singulares habeant necesse est, singulis priuatas corporibus. Paulo mitioris quum sint ut plurimum indolis, non tot mortalium præcipitant, quam quidem epidemicæ. Commoda est malignarum huius classis distinctio in sporadicas solitarias, (neque contagiosas, neque exanthematicas,) & in istiusmodi sporadicas, quas & exanthemata distinguunt, & contagium. Harum tamen, quod monemus, contagium, angustiori in ambitu vagatur, nec facile ultra eos, qui proxime cum ægroto versantur, progreditur.





## §. 11.

Aëri in epidemicos morbos præcipuam vim esse, notum est. Is autem aër febribus malignis inprimis est opportunus, quem exhalationes ex aquis stagnantibus atque corruptis, aut ex re qualicunque putredinosa, turpem reddiderunt. Pari censu venit aër australis *b)* humidus, calidus, nebulosus nullis patens ventis. Æstate quoque diutius ficiori si insequente autumno borealis ventus spirat, idem euenit. In genere autem mutatio quæuis tempestatis vehementior atque improuisa, vti pessimis morbis, sic & his febribus quam maxime est commoda.

## §. 12.

Aquæ paludosæ, stagnantes, putridæ, & compluribus aliis morbis, & his inprimis febribus facilem præbent originem, eas iam ipse Parens Medicinæ HIPPOCRATES, mortalium corpora corrumpere dixit. Istæ etenim putredinis animalis fœcundum sunt seminarium, & inde consimilis indolis effluuiorum spissam in aërem emittunt copiam. Probe itaque de publica utilitate sunt meriti, qui suaserunt, vt locis, circa quæ magna est istiusmodi aquarum copia, exsiccatione prospiciatur, id quod multum Romæ proficuisse clarissimus LANCISIUS testis est. *i)* Per eandem rationem inundationes fluuiorum tantum noxæ ferunt, &, vt rei exemplum habeamus, ipsa pestis Ægypto ex inundationibus Nili videtur endemia. *k)*

## §. 13.

*b)* Calido atque humido simul sumptis, partes animales nil magis destruit. Sub hac aëris conditione dirissimus morbus, teste HIPPOCRATE (*Epidemicorum* 3.) ciuitatem Abaton deuastauit, per cuius fœuitiam quibusdam pedes & brachia deciderunt.

*i)* Vide eius Tractatum de noxiis paludum effluuiis. p. 13..

*k)* Conferatur BAGLIVIUS: Certa, iste inquit, Romanorum obseruatione





## §. 13.

Inter cibos eos quam maxime ad pessimos morbos corpora parare scimus, qui putredini sunt propiores, aut qualitercunque degenerantes. Huc referre possumus, carnes animalium antea ægrotantium, nunc facile putrescentium, fructus corrosivo rore, aut insectorum infectos seminio. Neque minus cibos, qui per suam naturam sunt calidi, aut vehementer aromatizati, duri, crudi, dyspepti, inconsumpti, dum largius assumuntur. Inter potus putrida aqua quam maxime nocet, nocet etiam vini & aliorum spirituosorum potuum, aut calidorum, atque simul aromaticorum abusus. De Caffee autem inprimis constare volunt, quod ex eo tempore, quo nimius eius usus esse cœpit, exanthematicæ febres mali moris, præcipue purpura, obseruentur frequentiores. 1)

## §. 14.

Diximus (§. 10.) complures malignarum febrium esse contagiosas, de contagio itaque aliquid hic differendi, non ineptus erit locus. Commode contagium per qualemcunque

tione constat, post ingentes Tyberis inundationes, oriri febres epidemicas in vrbe valde graues ac perniciosas. Praxeos Medicæ L. I. p. m. 51.

- 1) Id inprimis contendit illustris HOFFMANNVS, vti videre licet in Medicinæ rationalis Systematicæ T. IV. P. I. S. I. C. IX. §. 12. & eiusdem T. IV. Parte V. C. III. §§. 29-34. atque in illius Dissertatione de purpuræ genuina origine indole & curatione, respondente STEPHANO MACKIO habita, 1725. Auctoritas tanti viri complures recentiorum in eandem sententiam pellexit. Fuêrunt tamen, quibus contrarium asserere placuit, neque sine graui ratione. Huc referendi inprimis sunt clarissimi viri NEVMANNVS, SCHARSCHMIDT & GERCKE, quorum cogitata solidissime expendit Præceptor quondam noster adhucdum pie colendus b. d. GMELIN, in egregia Dissertatione de febre miliari, Tubingæ 1752. habita.



que materiam morbificam definiri potest, quæ in alia incidens corpora animalia, morbum consimilis speciei in iis producere valet. Ideo necesse erit, vt ipsi specificam adscribamus indolem, nunquam etenim alios, nisi quidem sui generis vel speciei produxit morbos. Idem illud, si in animalia defæuit, non facile extra eiusdem generis animalia extrauagatur. Aërem liberum pro qualicunque praua sua conditione, corpora ad contagium facilius recipiendum posse præparare vtique certum est, num autem iste contagium ex vno corpore in aliud possit transferre, de eo liceat adhuc dubitare. Pestis etenim ex oriente, an vmquam, nisi mercium ope ad Europæa littora translata est? id insuper per experientiam constat, finitimos iis vrbibus, in quibus pestis sæuit, pagos, dummodo fossis atque excubiis de omni commercio, cum afflictis locis sibi bene prospexerint, integros permansisse. Annon itaque contagium, immediato aliorum corporum contactu potius propagatur? Etenim, licet non ignoremus, contagiosum morbum frequenter latiore sensu sumi pro omni epidemico, & vocabulum contagii denotare multis materialem morbi causam per atmosphæram plurimis communem dispersam, adeoque facile multos afficientem, & eosdem in morbos præcipitantem simul, si eundem hauriant aërem. Alia tamen contagii angustior significatio merito hic nostram sibi vindicat attentionem, qua proprie tantundem sibi vult, ac infectio, quæ non aliter accidit, nisi per contactum immediatum corporis ægrotantis & sani, vel certe materiæ, aut primarium morbum constituentis, aut ex eo generatæ, vel immediatum, vel mediatum.

§. 15.

Inter *ætates*, iuuenilem, adultam atque virilem febribus



bus malignis frequentius affici est obseruatum. Ex *temperamentis* autem sanguineum & sanguineo - cholericum præcipue hic accusanda censemus. Cæterum homines plethorici, cacochymici, & quibus laxior est corporis habitus, sæpius quoque sic ægrotant. Neque ii reticendi sunt, quorum vires crebra ebrietate, nimiaue venere, aut longa fame sunt labefactatæ. Idem monemus de iis, qui hypochondriaci sunt, & vitæ sedentariæ assueti. Grauius etiam laborant, atque difficilius emergunt, qui nuperrime viscerum, præcipue hepatis aliqua labe affecti, maligna nunc febre corripiuntur. In puerperis vti constat, purpura alba præ aliis frequentior est. *m*) Denique & omnes, quorum animus vehementioribus commotionibus facilius patet, meticulosi præcipue atque iracundi, sæpius malignis febribus decumbunt.

### §. 16.

Haud incongrue diuidi possunt malignæ omnes, in tales, quæ priuato corporis vitio sunt enatæ, & in eas, quas epidemicus status, vel contagium intulit. Illarum initia lentiori gradu procedunt, etenim sic ægrotaturi de aliqua lassitudine grauatiua *n*) aliquot sæpe hebdomades, antequam

*m*) Quod de puerperis, purpuræ albæ inprimis opportunis, clarissimus WERLHOFFVS monet, omnino hic locum meretur. Vix vidi, inquit idem, in puerperis, purpuram illam, (albam putat,) nisi, vbi difficilius extractam secundinam percepi. (Observationes de febribus pagina mihi 294.) & in vltiorem rei probationem adducit ibidem clarissimi FUCHSII obseruationem, de sphacelo vteri frequentissima mortis puerperarum causa, vbi hic pariter purpuræ ac mortis ex aulsa secundina exemplum recenset.

*n*) Istiusmodi lassitudines veteribus spontaneæ vocabantur, id est, tales, quæ a nullo graui labore, vigiliis nimis, aut alia tali causa euidente sunt productæ: ad eas olim penitus attendebatur quam nunc, & in





quam morbus fit conspicuus, conqueruntur, animo sunt morosiores, insomnia turbulenta habent, vigiliæ, aut inuitis ipsis diutius producuntur, aut intempestiuæ somni cupidines incidunt. Si quid antiquæ fluxionis, siue arte productæ, siue naturalis, vti per fonticulos, pedum sudores, fluores albos & consimilia adfuit, id nunc solet cessare. Produnt se contra variæ & plerumque exiguæ sanguinis fluxiones, quales sunt paucae sanguinis ex naribus decedentes guttulæ. Per corpus & artus dolores varii percipiuntur, in quibusdam stabiles, fugaces in aliis. Capiti etiam fugitius atque obtusus dolor inest, aut fronti sæpe aut occipiti infixus, cum leui vertigine. Aluus minus constans est, nunc lubrica nimis, nunc sicca atque tenesmodes, ipse corporis habitus atque vultus, spasticis atque subitaneis vicissitudinibus diuersimode mutantur. Omnibus autem id commune est, vt sub initio horrorem percipiant, qui primis diebus inordinatis accessionibus redire consuevit, vesperi tamen inprimis persentitur. Et qui hos horrores percipiunt, dummodo alia simul insint symptomata, eos iam malignæ febris implicitos esse censere possumus. o) Interdum contra vulgarem malignarum indolem ex profundo rigore, qualis intermittentibus esse solet, febres hæc initia sumunt, sed, qui ipsum sequitur calor, non æque vehemens est, exiguus potius, & crebris horroribus interruptus, pessimæ febris indicium. Porro tum oculis tristior aspectus est, minus candidi sunt atque puri, & variæ

varias discescebantur classes. Vide GALENI Commentarium in HIPPOCRATIS Aph. L. II. A. 5.

o) Recte ideo HIPPOCRATES: qui subinde inhorrescunt, & sæpe tenui sudore corripuntur, ii maligne habent. Coac. Prænot. l. 13. conf. 36.



variæ imagines illis obuersantur. Sæpissime sic decumbentes catarrhali aliqua febre sibi videntur laboraturi, tum & tussiculam habent, & oculi serosum liquorem fundunt, & coryzæ adfunt qualiacunque simulacra. *p*) Fauces atque lingua, præcipue matutino tempore ficciora sunt, hæc ipsa utcunque albicat, labiis etiam quædam squamosa inest ariditas. Appetitus deiectus est, interdum inconsuetus, nausea insuper adest, & præcordiorum anxietas, cum colici doloris simulacro. Qui tunc conspici possunt sudores, pessimis moris sunt, intempestiui vtique, fugaces atque particulares, *q*) in capillitio, dorso, clauiculis aut fronte potissimum apparentes. Quæ autem ad secundam classẽ pertinent febres, multo acceleratius oriuntur, & subitanea magis virium prostratione, grauiusque vrgentibus symptomatibus sunt conspicuæ.

#### §. 17.

In vltiori harum febrium progressu complura alia apparent symptomata, quorum tamen aliqua iam sub initio sæpe adfunt, quæ nunc dicemus. Os ex calore interno aridum sæpe est, atque propter bilem amarum, alias aphthis quoque obsitum, aut viscido obductum muco. Lingua aspera est, fissa, pustulosa, in quibusdam supra modum tumens. Nonnumquam lacteo quasi colore in anteriori parte perfusa videtur, vtroque latere interim rubente. Neque tantum lingua sæpe inflammata est, sed & quæ ipsi proximæ sunt partes. Dentes in multis liuent, aut aridi sunt,

*p*) Absque dubio ex his symptomatibus deducendum est, cur tot malignæ ad catarrhales malignas referantur, quæ tamen sæpe longe alius sunt indolis. Cauendum quoque, ne malignæ huius classis, sub initio, ob mitia sua symptomata, pro catarrhalibus benignis habeantur.

*q*) Coac. Prænot. 42. Prognost. 24.





sunt, quod non immerito ex vitio viscerum abdominalium ortum esse, voluit HIPPOCRATES. *r)* Oculi in aliis concaui sunt, in aliis protuberantes, aut feroces atque splendidi, vti phreniticis. Subinde album eorum intensius rubet, aut stigmate saltem rubicundo est notatum. Aures tinniunt, dolent, aut plane obsurdescent, id quod, quemadmodum inter mala signa perniciosi quid est, sic inter bona nil exitii portendit. Ea enim surditas sæpe post febres, ceu multæ aliæ metastases per aliquod tempus est continuata. Subinde & deglutitio molesta fit, & fugitivi spasmi laryngem atque œsophagi caput obuersantur. Sitis in his febribus plerumque intensissima est, nonnunquam calore non obstante nulla, quod vtique pro graui signo habendum. *s)*

### §. 18.

In pectore interiora æstus perurit, circa præcordia vehementissimus dolor sentitur, & anxietates grauius vrgent. Quibus inprimis fit, vt inconstantes admodum sint ægroti, & locum semper mutare velint. *Respirationum* diuersimodæ species obseruantur, huc referri potest respiratio illa sublimis in febribus quibusdam malignis, vbi is stupor, quem Catochum Aetii vocant, cum respiratione anhela ad mortem tendit, obseruari consueta. Alia est respiratio, quæ imminente delirio inprimis apparet, sub ea inspiratio nondum ad finem perducta, subinde quasi spasmo intercepta, subsistit, insequente mox alia breui inspiratione, quam longa dein & tremula sequitur expiratio & vicissim. Interdum

*r)* De interioribus affectionibus XXXIV. & ex eo CELSVS p. m. 62.

*s)* In præcipitibus malis, si sitis temere, ac præter rationem cessat, malo est, Prædict. I. 57.



terdum hæc exspiratio sub vigoribus malignarum, & comate vigili, & sic pariter inspiratio, quasi intercepta, cum singultu, tussicula, & sonoro coniungitur suspirio. In malignis pessimæ notæ alia singularis respiratio interdum obseruatur, quam planctuosam dixit HIPPOCRATES. Bene eam GALENVS respirationi puerorum comparat, cum flere desinunt. Æque mala est respiratio, in his affectibus circa mortem, si stupor simul adest, haud infrequens, sub ea thorax modo vehementius, vt in anhelitu, modo tarde atque debiliter mouetur, spiritusque propulsis efflatur labiis. Atque vt alias prætermittamus, dicimus saltem, eas omnes respirationes fere semper lethales esse, quæ frigidam auram, per os atque nares emittunt, cum alarum nasalium motu, inprimis si ægroti simul tacite deliri sint, atque stupore obruti. In stupore tamen illo AETII, tepida exspiratio inter frigidiuscula extrema, sub pulsu pleno & molli, siue tardo, siue celeriori paullo, non adeo desperata est. Quæ in corde obseruatur palpitatio ea pessimis malignarum præcipue est frequens. Vomitus biliosi intra initium harum febrium iam incidere solent, aut saltem nifus, ad istos, cum maxima nausea, *t*) & sæuissima sæpe cardialgia. Hæc cardialgia, semper aliquid momenti habet, magis tamen si serius adest. In artubus, dorso, lumbis atque aliis partibus dolores percipiuntur, quos rheumaticos vocarunt veteres, dubitamustamen, num  
non

*t*) Monendum est vomitus istos biliosos inter initia morbi incidentes non malæ notæ esse, sed potius molimina naturæ in suas vindicias. Sed, qui postea fiunt, per incrementa ad vigorem vsque, hæterogenea varia, atra, fusca viridia, quin etiam ingesta non immutata eiicientes, nisi id per fastidium & mente integra fiat, illi pessimi sunt, & peiores semper, quo plura mala symptomata simul adsint.





non potius pro spasmodis ex primis viis consensualibus sint habendi. Sub initio morbi iam sæpe tremor manuum obseruatur, in carpis tendines leuiter contrahuntur, & musculi per varias corporis regiones palpitant, posthæc grauiiores conuulsiones superuenire consueverunt, nunc particulares, nunc vniuersales.

### §. 19.

Sed, quam sollicitè hîc notandam censemus, est illa exulceratio gangrænosa quodammodo indolis, circa os sacrum, coccygis, cristam posteriorem ossis ilei vel trochanterem maiorem ossis femoris huic morborum generi adeo consueta. Ea pro lethali signo haberi potest, si iam sub primis febris diebus apparet, minus autem si serius ingruit, tum potius diuturnum morbum significat, atque metastaseos cuiusdam seu vlceris naturalis indolem habet, reliquias morbi exhaurientis. Melioris etiam iudicationis est, si non ad ipsa ossa profundius descendit, superficiem magis tenens, atque in suppurationem prona, pus bonæ notæ fundit. Exinde capere possumus, nullo modo hanc exulcerationem, pro simplici intertrigine esse habendam, licet quidem locus eruptionis, in eo latere fiat, cui ægri crebrius incumbunt, atque id ex cl. BRENDELII experientia nobis constat, post tempestiue adhibita vesicatoria, etsi diutule vix adhuc suppurent, multo rariores fieri eiusmodi metastases, natura tunc potius per factas exulcerationes se se exonerante.

### §. 20.

Insuper & circa somnum, & circa vigilias multa hicprehenduntur, quæ in statu sano non sunt. Complures  
et-



etenim malignarum, inprimis pessimæ, u) aliquid soporis, vel stuporis iam sub initio ostendunt, atque simul taciturna deliria secum ferre consuerunt. Peruigilia potius in incrementum morbi aut eiusdem vigorem incidunt, atque manifestiora exhibent deliria. Quorsum & prouti cum aliis signis adsunt, conuulsiones indicare possunt, x) referre debemus aliud peruigilii genus, (quod Coma vigil appellant, & verus stupor est,) in vigores malignarum quam maxime incidens. Sub eo æger taciturne delirans quietus iacet, interdum dormientis in modum, at tamen vigilans. Diuersus ab hoc stupor est, CATOCHVS iste AETII, y) in incrementa harum febrium, aut vigorem haud rarissime incidens, & diurnitatis potius morbi, quam proximi exitii index. Sopororum rationem ex ipsa

u) Febrem cum sopore HIPPOCRATES absque exceptione malignam dixit. Prædict. I. 74.

x) Peruigiles, cum aliis signis, in conuulsionem tendunt. Coac. 20.

y) Quem elegantissime describit L. VI. C. 4. Medium quoddam, inquit ibi, inter phrenitidem & lethargum obseruabis genus affectionis, delirii scilicet speciem leuiorem ex humore potissimum atrabiliario, leuiorem lethargo. Similes videntur dormientibus, habent autem nonnihil apertas palpebras, & subinde nictant, aut aliquid, fixis quasi palpebris & immobilibus oculis aspiciunt. Si quis manum oculis admo-ueat, myopum instar palpebras contrahunt. Sine voce sensuque sunt, non audiunt, non respondent, manus subinde capiti admouent oculis item & naribus, has quasi sculpturi. Pulsus parui, tardi, nonnihil intermittentes: respiratio modo crebra, modo rara. Per interualla profunde inspirant, vehementius expirant vicissim. Alui vrinaque interceptio est, non præ siccitate, sed quia non sentiunt. Canthis oculorum siccae adhærent lemæ. Nonnumquam proximo parieti sese admouent: vtque paucis dicam, neque phreniticis omnino similes sunt, neque lethargicis., His adiici potest plerumque ægros inprimis extremis quodammodo frigere, tum etiam saluam illis immodicam esse. Conferantur vtique Dissertationes de Phrenitide & Lethargo, sub præsidio Illustris BRENDELII habitæ.





ipsa cerebri pressione, vti vulgaris fert sententia haud facile possumus deducere, potius hic & spastici quid subesse, & ex imo ventre consensualis negare non possumus. Ægros enim per data vomitoria ex sopore suo expergefatos, haud rarissime vidimus, atque ipsa aluum ducentia idem sæpe præstant. Quo & illud HIPPOCRATIS referendum est: sopore, lassitudine, ac surditate tentatos, alvus erumpens, & ad iudicationem rubra demittens iuuat. z) Deinde infantes hydrocephali, diu sine sopore superesse solent, neque facile eo, nisi sub proxima morte premuntur, alias potius peruigiles sunt, atque creberrimis vagitibus molesti. Neque ignoramus, soporosos homines, ut plurimum excitari posse, & respondere, interdum & aliqua sponte sua flagitare, atque licet quidem caro oppressi, excitari nequeant, scimus tamen sic decumbentes, vehementius irritatos euidentia percepti stimuli exhibere indicia. a) Quo nomine autem hæc omnia & complura alia, ex pressione cerebri, per humores, extrauasatos explicari queant, id sane, nullus perspicio?

### §. 21.

*Deliria* malignis febribus tam frequentia, in iisdem præcipue mala sunt. Etenim iam sub initio morbi insomnia ut plurimum turbulenta incidunt, & breui post taciturna deliria. Hæc utique malæ sunt indolis, utcunque tamen

z) Coac. 182.

a) Addere possemus & alia. Neruorum ventriculi atque intestinorum in omnes partes corporis imperium, notissimum est. Vermis reptatu suo atque arrosione laceffens neruosas has partes, quoties iam conuulsiones prouocauit! Hernia suffocata haud raro subitam mortem, & ante mortem sæpe omnia grauius affecti cerebri signa exhibuit. Opium ingestum, in ventriculo adhuc contentum, solutum vix, omnes dolores sedat, nimias euacuationes sistit, somnum inducit. Taceo alia.



tamen melioris, quam ea, qua diuturnas excipiunt vigi-  
lias, aut veræ Phrenitidi interfunt, aut primis diebus  
superueniunt. *b)* Reuera & harum febrium deliria,  
potiori ex parte sunt ex imo ventre consensualia. Id  
vero docent, tot signa antecedentia spasticæ originis,  
(quorum potior pars ex coacis peti potest,) & leuata tam  
sæpe deliria vel intercepta post vomitum corruptæ bilis,  
aut laxiorem solummodo aluum. Nec leuamen adeo eui-  
dens post data euacuantia, (venæsectione cæteroquin non  
neglecta,) aut post naturalem somnum, contingere pos-  
set, si tum in cerebro inflammatoria subesset causa. *c)*

### §. 22.

*Pulsus* malignarum non in omnibus idem obseruatur.  
Haud raro sub primis diebus naturalis est, & sanorum pul-  
sui vsque adeo similis. Miror sane, qua ratione fieri queat,  
vt sub tantæ prauitatis febribus, sub tot grauius affecti ner-  
uorum systematis symptomatibus, pulsus tamen per con-  
spicuum tempus, naturalem statum adhuc conseruare queat.  
In multis alias pulsus debilis est paruus, aut frequens atque  
simul inæqualis. De soporibus notare debemus, quod tar-  
dus & simul plenus pulsus iis admodum vsitatus sit, &  
quod in comate vigili, dum in febris vigorem incidit, is ce-  
lerrimus obseruetur. Notatur insuper nonnumquam sub  
hoc febrium genere pulsus iste caprizans GALENI, qui  
dicrotus

*b)* At si febrium initiis delirium succedat, aut aliquod membrum fidere-  
tur, de hominis morte existimatio facienda est, nisi aut prorsus opti-  
mum aliquod signum superuenit. Prædictorum II. 85.

*c)* Euidens quoque exemplum est, deliria vehementissima esse posse,  
absque cerebri inflammatione, quod Illustr. BRENDÉLIUS se ipsum  
vidisse sæpe testatus est. Nimirum in cerebro hominis ex morfu ra-  
bidi canis Hydrophobia sublati, ne quidem vestigia inflammationis  
iste obseruauit.



dicrotus quasi est, cum intermittente coniunctus. Pulsus intermittens, quem adeo lethalem esse iuuenibus, GALENVS auctor est, in febribus malignis iisdem non talem se præbet. *d)* Potius id demum quando arteriarum ictus ægerrime explorari possunt, vt pulsus plane videatur abolitus, pro lethali signo erit habendum. *e)*

### §. 23.

Sed *urinarum* quoque varia est ratio. Sub initio sæpe sunt naturales, aut subrufæ atque turbidæ. Alias præmaturam coctionem affectant, dum primis iam diebus sedimentum deiiciunt, posthæc iterum crudæ euadentes. Quæ ruberrimæ minguntur, eæ post aliquot tempus nigredinem induunt, diuersam ab illa, quæ a cruore venit. Tales cruentæ vrinæ haud raro apparent, & dummodo magna satis copia emissæ sint, inter bona signa, salutem ferre queunt, leuamen naturæ, per speciem hæmorrhoidum sistentes. Admodum frequens etiam est hisce febribus, vrina illa aquosa, veteribus splenica dicta, quæ diutius producta morbi diuturnitatem potest denunciare, semper malæ notæ est, quum & viscera abdominis spasmodice affecta, & summam cruditatem denotet, sed eo peior, quo diutius durat, aut quo serius incidit, neque tamen illæ maiorem laudem merentur, quæ, licet turbidæ mingantur, diutius asseruatae sedimentum nullum præbent, aut præcipitatae quidem, nunquam tamen fiunt pellucidæ. Vrina pinguis & oleum quasi in superficie sustinens, colliquationem humorum, & febrem inde lentam consequuturam portendit. Eiusdem iudicationis est, quæ pro assum-

to

*d)* V. RIVERII Opera. p. m. 536.

*e)* TORTI in Therapevtice speciali. L. III. C. L. p. m. 181.



to potu, nimia copia emittitur, neque febris imminutionem secum fert.

#### §. 24.

*Sanguis* in malignis plerumque sano similis est, serius missus, inflammatoriam crustam habet, variis coloribus flauis, luridis, viridibus, per tractus variegatam. Alias primis iam diebus crusta adest, pleuritica isti adeo confimilis. In serius misso sanguine, serum ut plurimum copiosum reperitur, flauis coloris & liquidissimum, purpura interim in medio atra est, inæqualiter liquida, grumosa, nil veri coaguli habens, quasi omnis sublata esset cohæsió. In stupidis & soporosis malignis plerumque grate rubet, superficiem concepturus nitore quodam splendentem, quasi vernice obductam, insimul purpura solidior apparet, æquabilior, gelatinosa, naturali simillima. Interdum in malignis sanguis tam spissæ consistentiæ reperitur, *f*) ut vasa, in quæ emissus conseruatur, licet inuertantur, ne quidem guttulam eius emittant, atque idem sanguis dummodo per breue tempus in vase substitit, ad fragiles usque lamellas exarescit, neque ideo mirandum erit, ex his febribus defunctos, toties sub sectione, polyposas sanguinis concrecentias, in corde & maioribus vasis sub sectione præbuisse. In aliis contra per exanthematicas malignas sublatis, sanguis potius admodum floridus atque fluxilis est obseruatus.

#### §. 25.

*f*) In obseruationibus de aëre & morbis epidemicis Plymuthi per R. H. HUXHAM institutis, euidens exemplum prostat. In vehemēti enim Paraphrenitide, sanguis magis, quam in vilo forsan alio morbo, densus atque glutinosus ex vena multoties secta, semper effluxit, ita quidem, ut in sic affecto homine, intra quatrídium sex vicibus, centum fere illius vnciæ detractæ, tenacem hanc indolem, usque adeo seruerent, ut crassamentum illud instar corii scalpello vix posset disseccari.





## §. 25.

*Hæmorrhagiæ* in malignis sæpius malæ sunt. Omnes, quæ cum summa virium prostratione fiunt, hanc notam habent. Damnandus pariter est, vt diximus, iste sanguis, qui exiguis guttis e naribus stillat. Interdum & sputi cruenti vestigia sub initio inter pleuriticorum dolorum larvas adsunt. Sanguineus miæctus, si copiosus est, & per complures dies continuatur, pro bono censendus erit, naturæ etenim leuamen, per vesicæ hæmorrhoides denotat. Generatim autem asserere licet, omne sanguinis profluuium, quod exigui sudores, perfrigescentia, surditas, singultus, conuulsio, horror, rigor, sopor, deliria, nigræ g) aut prærubræ alui deiectiones insequuntur, pro malo esse iudicandum. Quæ vero primis fiunt diebus hæmorrhagiæ, id quidem commodum habent, vt ad tempus, symptomatum, inprimis deliriorum, afferant leuamen, sed crisin minus perfectam simul portendunt. Eæ potius laudem merentur, quæ copiosæ iudicationis tempore incidunt.

## §. 26.

*Alui fluxus* in his febribus frequentes sunt, atque sic excreta, a statu naturali quam maxime differunt; si generatim de lubrica aluo sub his febribus sententia ferenda est, eam nullo modo damnare possumus, potius, quum per eam corruptissima in primis viis hærens saburra eiiciatur, obstipatæ aluo multo erit anteferenda. Quod autem ad prognosin ex sic excretis pertinet, dicimus, quod malum minentur, omnes nimis liquidæ deiectiones, spumosæ, subcrudæ & cadaueroso odore infectæ, aut, quæ coloris sunt ex atro viridis, cinericei, luridi, rutiliue, pingues itidem &

g) Coac. Præn. 330.



& oleaginosæ, & complures aliæ, *b)* declamatis malignis aut in corporis extenuationem tendentibus adeo consuetæ. Deinde qualescunque spasticæ, impetuosæ deiectiones, cum debilitate quadam, anhelitu, & cordis palpitatione factæ, imprimis, si debilitas ista animi deliquium minetur, aut tremores, vel alia mala signa simul adsint, pro pessimis censentur. Quam primum autem hæ deiectiones mutari incipiunt, ita ut colore, odore, modo excernendi, naturali conditioni nunc propius accedant, tunc æger protinus mitiorem experitur valetudinem, atque insimul soporum atque stuporum, (si forsan adsint,) aut deliriorum persentiuntur decrementa. In malignas exanthematicas, quæ incidunt diarrhœæ, haud exigui discriminis sunt, quum exanthematum eruptionem impedire, vel eam iam factam facile reprimere queant. Neque tamen ideo subito suppressendæ sunt istæ, potius per blanda laxantia educendæ erunt corruptissimæ fœces, quo minus earum quid in sanguinem resorptum exanthematum indolem deprauare & omnem morbum grauiorem reddere possit.

#### §. 27.

*Sudores*, quos malignæ febres sibi vindicant, iniusto ut plurimum tempore incidunt, & particulares esse consueverunt. Dicimus autem particulares sudores, qui superiora imprimis in corpore occupant & pectus, aut solummodo extrema, reliquis partibus aut ficcis, aut saltem multo minus sudore madentibus. Qualicunque tempore isti incidunt, semper sunt mali, cum vrinis ut plurimum crudis & aquosis coniuncti. Peiores adhuc sunt sudores isti, insimul frigidi.

*b)* Legi merentur in hanc rem, quæ HIPPOCRATES habet in Coac. P. C. VI. de Deiectionibus.





frigidi. Qui per accessiones, inquit HIPPOCRATES, i) tussunt, & tenuiter exsulant, ii) maligne habere, iudicandi sunt, & per experientiam compertum est, eosdem, si vel emergant, haud raro, lenta posthæc febre opprimi. Iniusto autem tempore incidunt sudores, quando, sub initio febris, k) aut exacerbationis febrilis conspiciuntur. Symptomatici enim tunc sunt isti, quoniam nihil coctionis antecessit, atque hinc parum vel nihil tollitur de causa morbi materiali, sed tenuissima sanguinis pars potius distillatur. Conspirat crebra de febribus miliaribus observatio, quæ tantum non constanter docet, lethalem euentum esse sudorum profusorum primis septem vel octo diebus, apparentium, absque omni euphoria. Eos enim ut plurimum excipit circa ipsam expectatæ crisis periodum, summa extremæ cutis siccitas, neque copiosissimo calidorum potu, neque arte alia vlla superanda; imo vero certam haud diu post imminentem mortem portendens. Iure tamen excipiuntur isti morbi, quorum materia adeo tenuis est atque mobilis, ut primo sudore possit distillari, tunc enim sudores & in ipso initio morbi præsentés, non sunt pro malis habendi, neque vlllo modo coercendi, potius per sudorifera prudenter data, & exactissimum regimen sustinendi. Ex malignarum classe, huc in exemplum vocari meretur, mirabilis ille morbus, qui Ephemera Britannica, vel & sudor Anglicus vocari solet, in illo, sub ipso morbi inuadentis initio calidam quasi auram per membra discurrere sentiebant.

i) Coac. P. 112.

k) Dictum illud HIPPOCRATIS (Coac. P. 574.) consentit: Sudor una cum febre ortus, in acuto morbo, malus est. Et CELSVS recte monet, a sudore per siccum calorem prouocando cauendum esse, ne quid horum vel in febre, vel in cruditate tentetur.





bant ægri, *l*) atque illico subitus & largus sudor manare incipiebat, cuius profluxio si quando impediretur, actum erat de vita ægri; neque ulli tuto euadebant, nisi per viginti quatuor horas istiusmodi largissimum sudorem experirentur. *m*) Quod si citius abesse cœperit, breui nouum morbi insultum patiebantur, vel in difficiles morbos incidebant. Itaque omnis quæ adhiberi potuit, requirebatur cura, vt vitari posset sudoris suppressio, quam mox tumor liuidus corporis, & sensus quasi acicularum sub cute pungentium sequebantur, vna cum præsentissimo mortis periculo. Denique & hoc adicere liceat, quod haud raro in malignis *odor* aliquis peculiaris in *sudore* obseruetur. Sic in febre miliari, petechiis etiam, quum ista exanthemata florent, sudor quidam acidus & nauseosus obseruatur, semper suspectus, eoque his in febribus melior, quo minus acidus est, præsentibus scilicet iam exanthematibus. Circa mortem in compluribus malignis sudoris odor singulari modo nauseosus est, & sæpe cadauerosus. Cæterum omnes foetidi sudores, cum vitiiis imi ventris coniuncti esse videntur. Malignæ saltem febres & hæcticæ euident præbent rei argumentum.

§. 28.

*Exanthemata*, in malignis, (vti constat,) frequentissime apparent. Dantur febres, quibus per essentiam suam, & necessario exanthemata sunt coniuncta, vt variolosæ; dantur vero & aliæ, quibus exanthemata sua vt intersint, necesse non est. Sic febres purpuratæ haud rarissime sine pur-

*l*) IOH. CAII de Ephemera Brittanica Tractatus.

*m*) Annon hic sudor vere criticus est, in vigorem morbi incidens? Annon initium ac incrementum morbi, tam breui tempore absoluantur, vt id iam vigor sit, quò sudor initium sumit?



purpura sunt, certe præueniri potest his exanthematibus, per prudentem medendi methodum, <sup>n)</sup> ac vicissim per sinistram eam acutæ solitariae febres in exanthematicas & malignas queunt perueri. Neque plane incongruum videtur, si ad experientiam attendimus, exanthematum febrilium aliqua pro speciebus crasum imperfectiorum habere, quæ coniectura ad purpuras, ad febrem miliarem, scarlatinam, morbillos & febrem vrticatam potissimum pertinet; alia autem, vti petechias, maculas vibicesque ab extrauafatione tum ichoris cruenti tum humoris corrupti, forsan ex putri colluuie vitiatae bilis & intestinorum saburræ ad cutem translatis, deducere. <sup>o)</sup> Notissima malignarum exanthemata sunt miliaria ista, scarlatina, erysipelacea, variolæ mali moris, petechiæ &c. &, quos sola pestis sibi vindicat, bubones atque carbunculi. Nimum esset, hæc omnia nunc describere. Addimus potius præter hæc diuersa, quæ in his febribus semet conspicienda præbent exanthematum monstra, nunc huic, nunc alii ex dictis, prouti indoles sua est, propius accedentia. Maculæ nimirum variæ: aliæ rubellæ, profunde quasi radicatae, aliæ lentilulares & rubellæ, variolarum erumpentium instar aliæ, in flauos, luridos, & violaceos colores degeneres, aliæ protinus sic erumpentes vibices, quasi ex flagrorum ictu, factæ. Interdum & quasi ex intertrigine cutis enatae, singulares maculæ, seu potius extrauafationes subcutaneæ, nunc magis circumscriptæ, nunc latius diffusæ, plerumque

<sup>n)</sup> Talem suadet methodum nouissimus, qui de Purpura scripsit, Auctor, celeberrimus CAR. ALLIONIVS, in elegantissimo tractatu de Miliarum origine, progressu, natura & curatione. vide p. 95. 96. &c.

<sup>o)</sup> Vide laudatam Dissertationem de Seriori vsu euacuantium in quibusdam acutis p. 8. §. 5.





que cum inflatione quadam partis subviridis, lividæ aut violaceæ coniunctæ. Atque hæ sæpe eodem ambitu cutem occupant, ac quæ cadauera apoplecticorum exhibent suffillationes, & in artubus truncoque corporis sunt conspicuæ. Eiusmodi monstra exanthematica plerumque non inflammationes, sed extrauafationes ichorosæ, cruentæ aut corrupti feri sunt, & in cadauerum sectione in cellulosa subcutanea explicata, quin & in visceribus inter duplicaturas membranarum effusa conspiciuntur.

§. 29.

Atque, vt aliqua de *Crisi* addamus, id iam monemus, quod perfectæ crises in malignis febribus vix aut nunquam queant expectari. Eas potius illæ sibi vindicant febres, quæ ardentiores sunt ad contactum, & potissimum ex rigoribus ortum ducunt, quos proportionatus æstus insequitur. Magis etiam opportunus iis est robustior corporis habitus, corpus non senile, neque præcipuo aliquo viscerum abdominalium, potissimum hepatis vitio afflictum. Hoc viscus etenim, & quam conficit, bilis, vt ad coctiones physiologicas, sic & ad pathologicas multum momenti adferre videntur. Quum autem hæc in malignis febribus quam maxime afflictæ sint atque corrupta, §. 8. & 9. mirum non erit, crises imperfectas, recidivas nempe succedaneas, alias febres, chronicos morbos insequentes atque metastases, qualescunque huic febrium classi adeo esse consuetas.

§. 30.

Acutorum, inquit quidem optimus HIPPOCRATES, p) morborum, non omnino tutæ sunt prædictiones, neque  
mortis

p) Aphor. Sect. II. 19.



mortis neque sanitatis. Ideo tamen non vult, vt symptomatum ad prognosin facientium in morbis hisce negligatur obseruatio, qui potius ipse tam egregias nobis tradidit prædictiones. Multo magis vellicat aures, quod sapientius monet recentior Medicus celeberrimus, venerandus Præceptor meus MOEGLINGIVS, q) quando scribit: Exempla quotidiana monstrant optima etiam signa nihilominus fallere, nequitiamque diebus iudicationis, vel ante hos quoque accedentem ex improviso non raro ægrum iugulare. Ex *signis* autem *bonis* in malignis febribus omnino esse iudicamus, si Icterus sub diebus criticis demum incidit, r) nisi quidem durities insit dextro hypochondrio; si somnus naturalis est, & virium facit restorationem, si noctu inprimis incidit, & deliria sedat, si respiratio facilis est, atque post vomitum æger leuius se habere sentit, si surditas adest, aut obauditio sub ipso morbi statu. Insequuturæ etiam sanitatis signum est, haud adeo frequenter annotatum, si per nocturnam quietem adultis feminis aliquid involuntarie elabatur. Neque minorem laudem meretur quælibet copiosa euacuatio iusto tempore incidens. Hinc bonæ sunt sub vigoris stadio largiores narium hæmorrhagiæ, & per vulgarem viam, aut vesicam erumpentes hæmorrhoides, & quæ sunt complura alia, huc referenda.

### §. 31.

Sed *pessimorum symptomatum* multo largior est copia. Eorum multa iam diximus in Semiotica febrium malignarum

q) v. Excellentissimi Viri solidissimus Tractatus Pathologico-Præcticus exhibens febres continuas & intermittentes, p. 29.

r) Aphor. Sect. IV. 64. Coac. 121.





rum (§. 16. seqq.) liceat nunc alia adiicere. Nimirum initia ex soporibus, doloribus potissimum colli, capitis, & circa frontem, æque mala sunt, quæ cum artuum tremore, aut & voce protinus mutata exoriuntur. Pessimi etiam quid est & proximi delirii indicium, linguam protinus exarescere, aut nigricantem esse, lento muco obductam, cum crustis quibusdam fuscis ad labia, aut ægrum aperto ore iacere, idque conuulsium in modum distorquere. Neque minus multa ex oculis mala signa peti possunt. Hoc censu veniunt, si alter oculus minor apparet altero, aut si alteruter conniuet, altero tamen aperto, si ex semiapertis palpebris, album solummodo oculorum in conspectum venit, & quæ sunt eiusmodi plura, ab HIPPOCRATE in Coac. Prænot. C. de oculorum affectibus copiosius recensita. Facies vel sub progressu morbi non valde mutata, diuturnitatem quandam, transitumue in succedaneas febres portendit, & multo magis, si subinflata, & quasi cachectica sit. Sed facies celerius extenuata, acutius morbi discrimen indicat. Subinde mutari *faciei colorem*, modo pallere, modo rubescere, spastici quid est, sed cum deliriis atque soporibus coniunctum, acutum periculum portendit. Neque melioris iudicationis sunt, si vox, quod sæpe sub primis iam morbi diebus fit, intercipitur, aut, si eadem consuetâ obscurior redditur, aut clangosa, aut rauca, aut quasi ex cauo emissâ sonora. Deglutitio vtcunque difficilis valde suspecta est, quumque ægri, in leuando se se, anhelî, tremulis manibus potum subito capiunt, cum celeri deglutitionis connisu, id valde periculosum & pessime delirantium est. Quodsi vero potus regurgitet per nares, cum tussî quadam, aut si cum sonitu aliquo in specie vndoso versus inferiora, quasi caderet in vacuum, potus deglutiatur, sequen-





quentibus etiam quasi ructuum simulacris, id quidem pessimum est. s) Malum etiam denotat, ægrum continuo se se in lecto iactitare, semper vomiturire eundem, aut saltem vomendi conamina persentire, in tussim dein atque screatum desinentia, fœces etiam atque vrinam clanculum elabi, imprimis, si id sub comate, quod vigil vocant, euenit. Æque contemnendum est, ægrum manibus semper ante oculos oberrare, aut digitis floccos legere, aut extremis contremiscere, tendinumque subsultum experiri, aut extremis frigere. *Singultus* etiam, prouti in tempus aliquod incidit, diuerse est iudicandus. Dum etenim intra initium adest, adeo malus non erit, utpote tum soli forsan saburræ in ventriculo tribuendus. Peior iam est sub incremento morbi, sed pessimus idem, quando sub soporibus apparet. Dolores fugaces alicubi ad pectus tendentes, pleuriticorum instar acutos, quin etiam inter initia cum fallaci sputi cruenti simulacro semet exhibentes, deliria, ut plurimum lethalia, excipere consuerunt. Præcordia dolentia ad contactum mollia quidem, sed homine interim soporoso, lethalia sunt, & absolute lethalia, si dura, tensa, introrsum ducta æstuosaque fuerint, ægerque dolorem ex contactu, sopore interim non excitatus, facie testetur, respiratione insuper ex hypochondriorum pressione quasi intercepta, & in tussim vel singultum abeunte. Sed ne ultra præfixum terminum excurrat nostra peiorum symptomatum recensio, liceat nunc reliqua reticere.

§. 32.

s) Frequentis huius symptomatis rationes solícite expendit Cl. KLOECKHOF in opusculis medicis, p. 161. ubi & alia huc reducenda symptomata egregie illustrat.



## §. 32.

Denique tamen, ut proxime *insequentem mortem* præcurrentia allegemus symptomata, sequentia addere, non erit superfluum. Quo propius mors instat, eo fiunt ægri ponderosiores, iacent supini, incuruatis genubus & manuum digitis, soporosi sunt, alii floridam exhibent faciem, alii luridam atque collapsam. Nares amplius diducuntur, nasus acutus est, aures frigescunt. Spiritus per labia efflatur, bulbi oculorum subinde tremunt, abdomen spastice intumescit. In aliis febris inualefcit, cum pulsu vehementissimo, atque hi quidem subito moriuntur, cum sudoribus plerumque circa superiora particularibus. Alii soporosi jacent, atque simul alterutro latere & sæpe dimidiato corpore resoluuntur. Tandem multi post varias spasticæ respirationis vices, inter quas per intervalla strepitus in pectore exauditur, vehementer aucto hoc strepitu, interdum & convulsorio modo atque furioso se erigentes, suffocantur a morte, apoplecticorum similes extravasationes in cute exhibituri. Alii vero placide expirant, lenta quasi morte per aliquot dies producta. Eadem quoque mors ex rubra purpura & miliari febre, pallecente nimirum antea purpura, ac retrocedentibus miliaribus vesiculis inter spasmos crebrius contingit. In malignis maculosis febribus, neque minus in petechialibus, erysipelaceis, iisque etiam haud raro, quibus nulla exanthemata fuerunt, mors cum hypochondriis reductis & duris, plerumque subitanea, & instar lethalis atque præcipitis animi deliquii, incidere observatur, postquam tamen vno alteroque die ante mortem multum resipiscentes ad se se redierint ægroti.



## §. 33.

Pertractata sic malignarum febrium Pathologia, id nunc inprimis agendum esset, vt opportunam iis *Therapiam* adiungeremus, nisi quidem id in nimium extenderet nostram tractationem. Ne tamen omnem Praxin omittamus, de *vomitoriorum* in his febribus *recto usu* aliqua nunc liceat addere. Initio igitur instituendæ curationis iam dispiciendum erit, annon respiratio quædam peripneumonica, cum pulsu duro atque exili, & præsentis alicuius pleuritidis adsint simulacra, cum sputis etiam interdum subcruentis, & in genere explorandum, an non æger, nimio sanguine sit impletus, atque num symptomata adsint, ultra modum exæstuantis sanguinis? Quodsi enim horum aliquid obseruaretur, sanguis omnino ante datum vomitorium statim esset emittendus. Sed, si horum nihil apparet, protinus a vomitorio curationis fieri potest initium. Diximus etenim in prioribus, non facile inter initia harum febrium aliquid vitii in sanguine misso deprehendi, quum sanguis per malignarum & exanthematicarum initia integerrimo plerumque sit quam simillimus. Potius itaque tunc ad corruptam humorum colluviem, in primis viis hærentem in curatione erit attendendum. Suadent id euidentia symptomata, quæ nifus naturæ, in euacuanda hac saburra laborantis, verissime euincunt. *t*) Sic inter infantes vix aliquis morbillis, variolis, purpuratisque febribus corripitur, quin statim nausæ vrgeant, inque vomitus intensiores abeant. Atque licet id adultiori ætate constitutis, non æque fre-

*t*) Vid. Cel. WAGNERI methodum nouam medendi in malignis. In der Hamburgischen vermischten Bibliothek, II. Band 2. Stück, p. 224.



frequenter contingere videatur, quum generatim in tenella ætate naturæ nutus & salutare commotiones plenius adhuc atque melius eueniant; *u*) tamen crebrius certe, quam vulgo putatur, & in istis se idem indefesso obseruatori exhibebit. Insignis itaque vtilitatis esse poterit, hoc tempore datum vomitorium. Præmunitur etenim hoc modo ægrotus, ab horrendis illis symptomatibus, ex corruptissimorum in ventriculo, locisque vicinis hærentium humorum illuue ortum ducentibus, immo vero & fieri potest, vt edueta ista illuue, morbus iam in primis suis initiis suffocetur, quum alias iidem humores, ad sanguinem translati, vel mora sua peiores facti, admodum malignam indolem morbo potuissent inducere.

#### §. 34.

De eo itaque dubium non est, quod initio malignarum emetica conueniant; sed, an vltiori morbi progressu, pari iure ista possunt admitti? Equidem si experientiam consulimus, & magnorum virorum consensum, negare id non possumus. Tantum enim abest, vt serius paullo quoddam Ipecacuanhæ, aut tartari emetici præbium vires vltius deiciat, vt potius eas augere videatur: Nam & deliria, si non quiescunt, minuuntur tamen, magis recreatus æger apparet, si vel alius soluta inde fuerit. Ipse SYDENHAMVS, vir adeo attentus in morborum naturam, a seriori emetici exhibitione minime abhorruit. *x*) „Quod si nobis, inquit enim, vt sæpe fit, sero accersitis, non licuerit, emeticum propinando, ægrorum saluti sub febris initium consulere: certe tamen conuenire existimauerim, vt quouis morbi tempore illud fiat, modo

*u*) Solidissimas huius canonis rationes addit laudatus Vir l. c. p. 226.

*x*) In operibus medicis, T. I. edit. Geneu. pag. m. 33.





modo vires eo vsque morbus non attriuerit, vt emetici vim ferre iam amplius nequeant. Ego quidem die febris duodecimo vomitum imperare non dubitavi, etiam cum æger vomiturire desiisset, neque sine fructu: eo namque diarrhœam sustuli, quæ sanguinem in peragenda despumatione impediuit; quin & serius idem facere minime dubitarem, nisi virium attritarum ratio prohiberet., Quod hic de diarrhœa dicit egregius Auctor, id haud sine necessario limite in febribus malignis est intelligendum. In his etenim fieri sæpe consuevit, vt diarrhœa aliqua serius appareat, quam, tum ista biliosæ putrilaginis incrementa, tum metastases ad intestina, naturam ad vindicias quasdam per aluum lubricam prouocantes efficiunt. Hoc saluberrimum naturæ conamen inuvertere, quam maxime temerarium esset. Omnis itaque emetici vsus sub ista diarrhœa erit excludendus.

#### §. 35.

Quæ autem tam sera fit vomitorii exhibitio, vt iam lethalia signa adsint, eam nullius vsus esse, Auctores testantur. Eiusdem sententiæ est clarissimus BRENDELIVS in Dissertatione de seriori vsu euacuantium in quibusdam acutis. Sera nimis, inquit ibi, γ) & prospiciendis signis lethalibus exhibitio, minime conuenit: si tamen inter prognoses de rebus fere conclamatis, proponendum adhuc censuerit rerum vsu exercitatio: aut nihil agere prorsus, deleta iam vi neruorum ventriculi obseruabit, aut vno alteroque in vomitum molimine, inanem potius & malignam spem refocillare, quam quod reliquum vitæ est, extinguere. Liceat autem exemplum adducere, in quo non quidem quoad numerum



merum dierum, sed potius quoad pessimorum signorum præsentiam, vomitorium nimis sero adhibitum posset videri, quod tamen salutarem, ut ipsi vidimus, præbuit effectum. Vir, nimirum 30. circiter annorum febre putrida laborans, inde a morbi initio, tantam iam exhibuit pessimorum symptomatum congeriem, ut iam tum morti videretur proximus. Præter enim, quod ardor in cute insignis esset, pulsus frequens & parvus, & respiratio valde laboriosa, vox etiam anxiosa atque delirans. Comate etiam oppressus iacuit, floccos legit, abdomen tensum fuit, lingua arida & fissa, oculi in alba parte rubebant, turbidi erant, atque semper ad dimidium aperti, fæces atque vrina, inscio ægro, emittebantur. 2) Virium deiectione vero iam 7. die tanta fuit, ut dummodo in lecto erigeretur, mox imminentis deliquii experiretur minas. Quum & dicta, & alia symptomata, usque ad 13. diem continuata fuerint, hoc ipso die demum ipsi vomitorium insequenti modo fuit exhibitum.

℞. Tartar. emetic. gr. ij.

Diffolu. in aq. font. ℥i. D. ad vitr. S.

**Deſters davon zu etlichen Löſſeln zu nehmen.**

Tanti usus fuit hoc remedium, ut, post excitatum inde largissimum vomitum, viridis atque pessime olentis bilis, atque atras per aluum fæces insequutas, tetri ad modum odoris, æger ex sopore expergefactus, ad rationem perueniret, & proximis diebus euidentem exhibe-

2) Neque ideo semper valet monitum illud, in modo citata Dissertatione p. 15. traditum. Male nimirum proponi quaecunque euacuans, quando in malignis exanthematicisque, fæces & vrina iam elabuntur non sentienti.



hiberet extremorum symptomatum remissionem, atque sic demum accedente vltiori consueta curatione fuerit restitutus.

### §. 36.

Vomitoria autem, aut sub initio exhibeantur, aut serius, sub declinante febris exacerbatione, vel ipsa remissione, quam optime dantur. Atque licet quidem hæc tempora, in malignis febribus nobis erratica videantur, obseruabimus tamen, non deesse plane his ipsis typos suos, atque periodorum ordines, dummodo ad exacerbationes, plerumque vespertinas, satis æquabiles & manifestas attendamus: memores, remissiones primorum dierum subobscuras tantisper esse posse, & exiguis quasi exacerbatiunculis occupari. Sed post tempestive datum vomitorium, hæ ipsæ luculentiores reddentur, & insequentibus exacerbationibus maior erit ordo. Denique non id pro unico effectu emeticorum habemus, vt inde primæ viæ a contenta saburra liberentur, quod & per sursum factam euacuationem fieri consuevit, & per aluum laxiorem redditam fieri potest. Sed id quoque notandum erit, laceffere vomitorii stimulos & excitare quasi torpentes, potissimum circa concursum paris vagi, & intercostalis nervos: atque ideo ex consensu in vniuerso neruorum systemate dispositionem inferri posse, quæ a naturali nunc propius abest, Unde videmus, si vel nihil euacuationum productum fuerit per vomitorium, licet sub iusta conditione sit datum, leuatos tamen inde vt plurimum ægros conspici.

---

Nota: p. 5. not. d. loco: in prænot. XLI. substituendum esse; in fine libri de diebus criticis, & p. 6. not. e. loco: Coacæ Prænot. ponendum esse simpliciter: *Prænotion.* vel *Prognostic.*

EPILO-



## EPILOGVS PRAESIDIS:

**I**nterdum etiam vulgus verum videt, venerabilis dixerat antiquitas, & recentior agnoscit ætas; ea scilicet populi vox est, quæ, quod æquum est aperte, sequiturque lineas conscientiae Divino calamo inscriptas, non humanis extinguendas umbris, in omnibus confirmat exemplis. Neque contradicit huic observationi Medicorum experientia, ubi de vita in humano genere conseruanda quæstio agitur, quamvis enim heic Epicuri cohors cum Iuuenali clamet:

*Summum crede nefas, animam præferre pudori,  
Et propter vitam viuendi perdere causas,  
Dignus morte perit, coenet licet ostrea centum  
Gaurana, & Cosmi toto mergatur abeno.*

Ipse tamen crebrior ægrorum in praxi medica obuiorum aspectus aliam prorsus etiam ipsorum thrasonum horum faciem exhibet, utcunque ante adiaphori visi fuerint, etenim tum demum ad seria hi ducunt ioci, hærentes animo propter gratiam, quam præ se ferunt. Si quid autem est, quod ea de re monere Medicum possit, est certe **MALIGNARVM FEBRIVM** contemplatio, quæ, ut ob dolosam indolem, ita propter insignia pericula, quibus cunctæ adsociari solent, omni ex parte Medicorum attentionem prouocant, quin etiam poenitentiam aliis extorquent inuitis, lecto malignis laborantium adstantibus, leuitatis Christiano indignissimæ, quæ fatuo ethnico ineuitabilis fati titulo mortem spernere iubet.





iubet. Et suppetunt sane febres hæ argumentum dissertationis medicæ grauissimum, quod, uti morbus ipse, circa quam versatur, Medicorum, omniumque hominum superbiam prosternit, ita & scribentem suum historicum sua sponte prohibet, quo minus bullatis turgescat pagina nugis. Equidem huius generis themata maxime amo, utpote adeo coërcendo Medico fastui, hominique deprimendo apta, & congrua, ut optarem certe, frequentius his indulgerent Medici meditationibus! Habent vero præterea elaborationes hæ insignem admodum pro uniuerso humano genere usum, si solo etiam viuere studeant rapti. Solam cogita ætatem, cui hæ insidiantur crebro febres? Quot non eripuit nobis, & eripiet porro furtiuum hoc febrium genus Viros maxime meritos de uniuersa Republica, tam litteraria, quam alia? Quantum igitur operæ pretium reportant, qui priuatis meditationibus has prosequuntur febres? Plus profecto laudis reportant, qui dolosum expiscari hostem sciunt, quam qui alium vincunt, aperto Marte agentem. Quare Tuum tanto minus reprobare consilium possum, Nobilissime Domine Candidate! quod hoc Tibi thema selegeris. Demonstras ita, non Te grauiora metuere Medicorum problemata, demonstras ita, seria Tibi placere; neque habeo, quod moneam contra momenta, quæ Tuam prouocauere attentionem, urges præcipue malignarum febrium pathologiam, primoribus tantum labiis therapiam tangis; præter priuatas enim Tuas rationes, quæ pathologiæ heic locum fecere præ therapia, malignæ sane febres ita videntur esse comparatæ





*ratae, ut, si quod aliud morborum genus, multo maiorem nostro certe tempore inuitent attentionem, quoad exactam suorum phaenomenorum historiam, quam therapiae respectu; mihi certe haec facilius multo apparet, ac illa. Est profecto mira phaenomenorum, quibus distinguunt se, multitudo, est in subiectis variis hoc morbo correptis plane singularis malignarum facies, diuersa forma, & alius effectus, rarusque alibi phaenomenorum dissensus, quapropter difficilius etiam, abstrahere ab exemplis multis, & omnibus ea, quae possint inseruire generali cuidam febrium harum, & prudenti pathologiae, ad omnes applicabili malignas febres. Operam Tu dedisti omnem, ut nihil omitteres eorum, quae ad saniozem hanc pathologiam pyreticam pertinent, & ita quidem, ut vix habeam, quod addam. Patere tamen, ut cum nullibi Tuas interturbare industria plurima collectas observationes, & sollicitè digestas voluerim, aliquas adiciam alias, quae non in hac materia nullius esse momenti videntur. Fidelem quidem agis historicum in assignandis phaenomenis harum febrium omnibus, quibus tanquam signis uti possimus, utpote prudenter praevidens, in solidissimo hoc fundamento therapiae sanioris cardinem verti, prout autem in aliis nosologiae specialis exemplis, ita in hoc quam maxime desiderauerim distinctam eorum determinationem, quae mox in principio morbi malignitatis dolum aperiant, summiq; imminentis periculi gravitatem certo doceant. Quid enim, si expectare velis omnes malignitatis effectus, e quibus Dauus etiam coniiciat, adfuisse malignam febrem, serius profecto*





sapient Phryges, & morbum cognosces, tum demum, cum certo docta plus valet arte malum. Non dubito sane, febrium harum prima initia, licet in aliis alia sint, in omnibus tamen quædam habere communia phænomena, quæ malignitatem prodant, & ad generalia quædam porismata reduci possint, applicabilia ubique infallibiliter, neque dubito, quin maximæ utilitatis in ipsa therapia foret, hæc bene notare sibi porismata, sed non diffiteor, facilius e Nilo aquam bibere canes, ac firmos figere liceat huiusmodi canones. Neque tamen desperandum, id fieri posse, operæ pretium esse, ut fiat, res ipsa plus quam euidenter loquitur; quoties, quæso, labilis interim hora, diesque ante ruit, quam certi fuerunt Medici, subesse malignam febrem, quæ sua per initia præteruisa medelam respuit omnem. Quantum observationibus fidere meis possum, redit res ad breue quoddam dilemma, cuius si non omnia, certe quædam propria sollicita praxi arripuisse me cornua existimaui. Scilicet, aut morbus inuadit, pergitque mitissimis cum symptomatibus, uno tantum, alteroque constanter molesto, neque quoad acerbitatem suam, & vehementiam combinando e legibus etiam sanissimæ pathologiæ cum reliquis, aut plura habet mala symptomata, eaque a prima sua inuasionem, simul vero pauciora phænomena bona, quoad urinam, aluum, appetitum, & alia, quæ comparata cum toto eminentem prorsus eius a partibus dissensum clamant, & plus quam optima esse videntur, iurares, vix esse possibile, ut reliquis adstent. Addant reliqua magis exercitati, & acuti Medici; non tamen præterire possum,



possum, eos frequentius has pati malignas, qui per primos iuuentutis annos nimis excessibus in Baccho, & Venere, aut utrobique, vel etiam, raro studiosæ iuuentutis culpabili errore, immodica studiorum pertinacia, vel non imputando, in sexu præsertim sequiore, dispendio multi boni sanguinis per hæmorrhagias varii generis, & quæ sunt alia similia, systema neruorum viribus olim emunxerunt nimium, licet longa post interiecerint quietis interualla. Neque forsan, si cogites influxum in neruos, omni culpa vacat insensibiliter admissa diu atmosphæra pigmentorum variorum, præcipue simul saturninorum, quam recenter iis colorata spirant conclauiâ, in quibus versamur, & acuit forte noxam inde contractam cohibita, & mutata sæpe hinc perspiratio insensibilis, præsertim, si ad sudorem usque multoties promota fuerit, quemadmodum nouimus, has anomalias e peruerso frequenter admissas regimine solas viam huic sternere malo posse. Præterea vero sunt alia, quæ circa malignas has decisa optarem! Qualis proprie status est viscerum sub iis affectorum præternaturaliter? num ad gangrænam ea tendunt? num, hæc ubi fiunt, tota sanguinis alteratur massa, & omnis neruorum compages in perniciem corporis conspirat? & quomodo? unde singularis, toties in multis occurrens materiæ sudoris nauseosus, quandoque acidulus, & sæpe subputridus, cadauerosus odor? humorumque ipsius cadaueris recentis impetuosus orgasmus, per omnes patentes portas, cruo-

F 2

rem,





rem, aliosque latices expellens? Verum de tabula calamum  
reuocant grauiora, id est, vota pro Tua salute sincerissima!  
coronat studiorum Tuorum academicorum opus finis, eum  
summa cum laude istis imposuisti, faxit supremum in Cælis  
Numen, ut fructus eorum legas uberrimos, Tua dignos  
industria, mentisque nobilitate, inuenies his dum frueris,  
quantum iuuet didicisse fideliter artes, quam sit iucundum  
deliciis gaudere humanis, quas utinam Tibi sat cito & bene  
augeat Diuina Prouidentia optata Sparta! Perge me  
amare, mutuamque a me amicitiam non fucatam ex-  
pecta! Scripsi Tubingæ Idibus Iunii

A. R. S. MDCCLVIII.

